

**ՌՈՒԲԵՆ ՍԵՎԱԿԻ ՓԻԼԻՍՈՓԱՅԻՆՈՒԹՅՈՒՆԸ 20-ՐԴ ԴԱՐԱՍԿԳՐԻ
ՓԻԼԻՍՈՓԱՅԻՆՈՒԹՅԱՆ ՀԱՄԱՊԱՏԿԵՐՈՒՄ**

Բանալի բառեր և արտահայտություններ. Նիրվանա, Շոպենհաուեր, բուդդայականություն, Թումանյան, Ինտրա, Անհուն, վոլտերյան տոտեմի, Նիցշե, բանաստեղծություն, Գերմարդ:

Ключевые слова и выражения: Нирвана, Шопенгауер, буддизм, Туманян, Интра, бесконечность, вольтерский штатив, Ницше, стихотворение, Сверхчеловек.

Key words and expressions: Nirvana, Schopenhauer, Buddhism, Tumanyan, Intra, fathomless, volter's tripod, Nietzsche, poem, Superman.

20-րդ դարասկզբի գրականության մեջ մեծ մասամբ առկա է նախորդ դարավերջի փիլիսոփայության էական ազդեցությունը. Փաստ, որը հիմք է տալիս անդրադառնալու հենց այդ շրջանին: Դարասկզբին գրականության մեջ մեծ տարածում գտավ Ֆ. Նիցշեի փիլիսոփայությունը, «Գերմարդու» գաղափարը: 19-րդ դարի 90-ականներից Նիցշեի աշխատանքների հռչակին չէին զիջում նաև Ա. Բերգսոնի արվեստը, հայացքները: Կարևորվում էր ներհայեցությունը: 20-րդ դարասկզբին ֆրանսիական գրականության մեջ իշխող էր բանաստեղծությունը. Այլևս փոխված իրականությունը, նոր իրադարձությունները «ստիպում» էին գրողներին արագ արձագանքել, հետևաբար առավել «հարմար» էր չափածոն: Դասական վեպերից (բալզակյան ոճի) հեռո՛քեռն բացակայում էր ինտրիգը, սյուժեն, տիպական բնավորությունները, և նոր թափով գրականություն էր ներխուժում չափածոն¹: Այս շրջանում չափածոն տիրապետող էր նաև հայ գրականության մեջ, իսկ հիմնական թեման կյանք-մահ հավերժի ձևերն էին, սերը, ընդ որում, մի կողմից մահ հասկացության փիլիսոփայական կողմն էր քննվում, մյուս կողմից հայությունն անմիջաբար զգում էր մահը՝ ենթարկվելով թուրքի յաթաղանին: Այս ընթացքում էլ նեոռոմանտիզմի շարժումը, ըստ Հոնիգսհայմի, ծնվեց

¹ Французская литература в начале 20 века, <https://ru.wikipedia.org/wiki/>:

հանկարծակի և սկզբում մնաց աննկատ²: Շատերը այս նոր մեթոդը սիմվոլիզմի ուղղությունից չէին տարբերակում:

Ոչնչի, Անհունի, Նիրվանայի մասին խոհրդ Ա. Ալեքսանյանը համարում է 20-րդ դարասկզբի համար խիստ հատկանշական և հատկապես Ռուբեն Սևակի պոեզիայի այս շերտում ազդեցությունն է տեսնում բուդդայական ուսմունքի, ընդ որում, Սևակի խոհափիլիսոփայությունն ամբողջությամբ կապում է այս ուսմունքի հետ, ինչն, անշուշտ, անընդունելի է³: Մեծ հավերժի ձևերի մասին խոհերը գրողին ստիպել են հասնել մինչև «մեծ ինչուի» անպատասխանելի հարցին. «Անհունություն մը ժամանակը, անհունություն մը միջոցը. Ու մարդ հյուլէ մը այս երկու անհունություններուն մէջ կորսված. Անհունություն մը և այդ հյուլէն: Ով և ինչու դրած էր այդ անհունությունը մարդուս մէջ: Իմանալու զգալու, կամելու այդ աշխարհները պետք չէ՞ր որ ուղղություն մը՝ կետ նպատակի մը օրենք մ՝ ունենային իր մէջ: Իր մտածումը դուրս նետեց կյանքի անձուկ եզրերէն, դուրս նյութի այս աշխարհէն, ու անհունէն, բացարձակին մէջ գնաց հարցնել իր մեծ «ինչու»-ն կյանքին, մարդուն «ինչու»-ն⁴: Անհունի, մահվան մասին Վարուժանի խոհն էլ հանգում է հարցադրման, ոչ վերլուծության.

Վախճանողին գացած ճամփան. Ոհ, ի գուր
Կը փընտըռեմ հոն, իմ շուրջ,
Անոր անուն ի՞նչ է, կամ ի՞նչ է անունն
Անդըրշիրմի Եղածին, ու՞ր է Անհունն,
Ու՞ր է Խորհուրդն. Աղջամուղջ:
Ոհ, դու ո՞վ ես, ո՞վ անծանոթ վախճանած⁵:

Անհունի, Անհայտի որոնումներում Ինտրայի եզրակացությունները ընդհանրանում են Սևակի տեսակետների հետ. «Ոչ թե «Մարդը չափն է ամենայնի», այլ անտարակոյս Անհունը: Յոյն փիլիսոփան (Պրոտագորաս Մֆոդրցի-Ա. Ս.) իրաւունք պիտի ունենար, միա՛յն երբ մարդը նկատէր իբրեւ մէկ իմացումը Բացարձակին: Յանժամ, արդարեւ, Անհունին ըմբռնումը՝ չափը կ'ըլլար ուրիշ ամեն ծանօթութեան, կամ ինչ որ նոյն է, Անհունը՝ ամենայնի: Կեանքը հասկնալի է Յավերժութեամբ միայն: Ինչպէս՝

² Տե՛ս *Иовин Л.*, Георг Зиммель - социолог, Москва, 1981, էջ 10:

³ Տե՛ս *Ալեքսանյան Ա.*, Ռուբեն Սևակի կենսափիլիսոփայությունը, «Ռուբեն Սևակ. 125», Հոդվածների ժողովածու, Երևան, 2011, էջ 139:

⁴ *Ռ. Սևակ*, Երկեր, Երևան, 1985, էջ 23: Այս գրքից հաջորդ մեջբերումները կնշվեն տեքստում:

⁵ *Վարուժան Ղ.*, ԵԼԺ, Հ. 1, Երևան, 1986, էջ 43:

անչափելին կրնայ իբր չափ ծառայել. Եւ սակայն այդպէս է...տիեզերքը բոլոր, կը չափենք անով որ անկախ է ամենայնէ...միակ բան մը կա հասկնալի. Բացարձակն է այն. Ի՞նչ են օրէնքները զոր երեւոյթներուն ծոցին մէջ կը գտնենք յաղթական եթէ ոչ Բացարձակի եղանակաւորումներ, որոնցմով երեւոյթները կը բացատրենք»⁶:

Սևակը Ինտրայի նման Անհունի մէջ կարևորում է սիրո գերակայությունը: Մերը բարձրացնում է մարդուն նյութական կեցության օրէնքներից դէպի հոգեկանության ոլորտներ, ինչը իր ուսմունքի հետևորդների համար նշանակում է մոտ լինել Նիրվանայի⁷ երանությանը: Ըստ հնդիկների՝ Նիրվանան երանության, մոռացության աշխարհն է: Այդ ուսմունքի, ինչպէս նաև շոպենհաուերյան փիլիսոփայության ազդեցությունը կա Սևակի «Մարդերգություն» պոեմում: Անհավասարությունն ու սոցիալական հակասությունները, աղքատի հանդէպ դաժան վերաբերմունքը, կյանքում կատարվող անարդարությունները, մարդկանց օրէոր ակամա վատին ձգտելը, հոգևոր արժեքների կորուստը ստիպում էին հեղինակներին փնտրել ուրիշ մի աշխարհ, իրենց պատկերացումների աշխարհը, կամ նախընտրում են մահը՝ հավասարության դաշտը ու Նիրվանան: Այս ամենի արձագանքն ենք տեսնում Սևակի պոեմում: Արևելյան կողմում Ավ. Իսահակյանն էլ Սևակի նման իր խոհափիլիսոփայության մէջ զուգահեռել էր Արևելքի ու Արևմուտքի փիլիսոփայությունները, նրա գեղարվեստական գործերի մէջ միախառնված են Նիցշեի ու Շոպենհաուերի փիլիսոփայությունը, Նիրվանայի ձգտումը. «Նիրվանան լոկ ճշմարտությունն է և ամենի վերջը...Նա տիեզերքի երազն է, կյանքն է, հիացմունքն է – մենք անասուն ենք եղել, այժմ կիսաանասուն մարդ ենք, պիտի դառնանք հաստատ մարդ, հետո մարդ-աստված, հետո միայն աստված...և Նիրվանայում հանգչենք...Միայն Նիրվանայով կարելի է ոգևորվել. Միայն մեր ոգևորության ամենալայն հորիզոնը դա է: Նիրվանան՝ մնայուն, հավիտենական...»⁸: Ավ. Իսահակյանի պոեզիայում Նիրվանան մեծ լռության և խաղաղության խորհուրդն է բերում.

Ձայն-ձուն չըկա, սիրտս է միայն-

Մեծ լռության վեհ լեզուն՝

⁶ *Բնորա*, Հովին ձայնը, Երկեր, Գիրք Ա, Երևան, 2014, էջ 449:

⁷ Նիրվանա-Հին հնդկական կրոնական ուսմունքի (բուդդայականության) համաձայն՝ աշխարհային ամեն ինչից հրաժարվելու միջոցով ձեռք բերվող երանավետ հանգստի վիճակ, փխք. անդորր, երանավետ հանգստություն:

⁸ *Իսահակյան Ավ.*, Երկեր, Երևան, 1987, էջ 592:

Տիեզերքը գրկած համայն-
Ջանգի նրբան դողանջում⁹:

Այդպիսին է և Եղիա Տեմիրճիպաշյանի պատկերած Նիրվանան: Մարդու հանդեպ մեծ սիրուց ծնվում է մեծ ցավը, ավստասանքը, ու այդ տառապանքը հաղթահարելու համար հեղինակները հայացքը հառում են դեպի խաղաղ ներդաշնությունը: Սևակի, Բսահակյանի, Տեմիրճիպաշյանի մոտեցումներն այս դեպքում ընդհանրական են: Նիրվանայի մեջ չկա տառապանք, դա խաղաղության ձգտող մարդու համար օրինություն է: Ըստ Տեմիրճիպաշյանի՝ կյանքում ամեն ինչ հանգում է Ոչնչին, ունայն է ամեն ինչ, հետևաբար ի սկզբանե ձգտումը դեպի Նիրվանան, ճշմարիտ ուղին է. Գիտությունս է, տենչս է միակ-Նիրվանա...¹⁰

«Նիրվանա» պոեմի բնաբանը խոսուն փաստ է հեղինակի ըմբռնման մեկնաբանման համար.

Հոգիս համակ լցված է կարեկցությամբ աշխարհի հիվանդության
համար...

Մաքիա-Մունի

Ես զայն ցանկամ, զանեացումն իմ եսին
Հանհատակ ծոց տիեզերաց անպարույր.
Ցանկամ զհանգիստ ի ջուրս ի սուրբ Գանգեսին,-
Գանկն իմ լիցի թաղար ծաղկին սրբաբույր.
Զիմ էության վախճան ցանկամ, իմս Օհան,
Զոչնչությունն անգյուտ, անճառ, անվախճան...¹¹

Տեմիրճիպաշյանի պոեզիայում արծարծված կյանք, մահ, նիրվանա թեմաների մասին խոսելիս Ս. Թոփչյանը գրում է. «Տեմիրճիպաշյանը նիրվանան չի շփոթում ոչնչի հետ: Նիրվանայի գաղափարը բարձրագույն հարմոնիայի հասնելու միջոց է նրա ըմբռնումով, «անդրաշխարհային մեղեդի», որ մարդկային ոչ մի նվագով հնարավոր չէ արտահայտել: Այս գաղափարը ավարտն է տառապանքի, միայնության, «մեծ տխրության»¹²: Սևակի, Բսահակյանի՝ Նիրվանային ձգտումը նույնպես չի հասնում Ոչնչի ձգտման: Արմեն Սևանը ընդհանրություններ է տեսնում Տեմիրճիպաշյանի խոհափիլիսոփայության ու Սևակի «Մեծդ Աստված» բանաստեղծության միջև. «Մահվան շունչով օծուն, գեղեցիկ, և Տեմիրճիպաշյանական թռիչքով ու մեծվայելչությամբ բանաստեղծությունն մ' է «Մեծդ Աստուածը», որով

⁹ *Բսահակյան Ավ.*, Նույն տեղում, էջ 155:

¹⁰ *Տեմիրճիպաշյան Ե.*, Երկեր, Երևան, 1986, էջ 54:

¹¹ *Տեմիրճիպաշյան Ե.*, Նույն տեղում, էջ 58:

¹² *Թոփչյան Ս.*, «Եղիա Տեմիրճիպաշյան, Երկեր», Երևան, 1986, էջ 18:

բանաստեղծը, հրաշափառ տիեզերքն ու բնութիւնը տարփողել է յետոյ, կ'անդրադառնայ մարդ էակին թշուառութեան ու անկարութեան, իրապէս ներշնչուած և ժուժկալ տողերով»¹³:

Ահա՛ Մարդերդ: Ահա Մարդերդ ալ Աստուած,
Տխուր հիւրերն այս հրաշագեղ աշխարհքին.
Թափառական, վաղորդայնէն ընկճված,
Ճղճի՛մ, թշվա՛ռ, հո՛ղին կառչած, ախտա՛գին: (144)

Մենք չենք տեսնում էական ընդհանրություններ երկու բանաստեղծների միջև, ավելին, կան որոշ հակասություններ. Տեմիրճիպաշյանի ստեղծագործության մեջ իշխող է երազը, հուշը, տրամությունը, անընդհատ խոհը, իսկ Սևակի պոեզիան կենսաշատ է: Սևակը լուծումներ, ելքեր է առաջադրում, անտարբեր չէ մարդկության ապագայի հանդեպ: Այս բանաստեղծության մեջ Սևակը հակադրում է կատարյալ բնությունն ու անկատար մարդուն, որը պիտի արժանանա բնության գեղեցկությունը վայելելու հաճույքին, արժանի լինի բնության կատարելությանը: Էդ. Ջրբաշյանը զուգահեռներ է տեսնում Սևակի վերոնշյալ բանաստեղծության ու Հ. Թումանյանի «Բարձրից» բանաստեղծության միջև¹⁴, որը, կարծում ենք, շատ ավելի համոզիչ է, քան Արմեն Սևանի բերած զուգահեռը: Հ. Թումանյանն էլ տեսնում է կատարյալ բնությունը, որին հակադրվում է մարդկային տառապալից կյանքը, մարդն է իր կյանքը դարձրել «ահավոր ջեհնեմ».

Տեսավ աշխարհքը՝ գեղեցիկ, անվերջ
Եվ հայրենիքներն անձուկ նըրա մեջ...
Տեսավ ուտում են ամենքն ամենքին...
Եվ կյանքը տանջանք, ցավ համատարած...¹⁵

Թե՛ Եվրոպայի ախտն ու աղտը, թե՛ դարասկզբում հայության հալածանքները կարևորագույն գործոններ էին, որոնք պարզապէս ստիպում են գրողներին լցվել հոռետեսությամբ (թեկուզ մի պահ), երազել Նիրվանայի մասին: Եվրոպայի վիճակը շատ լավ պատկերացնում էր և՛ Սևակը՝ լինելով այդ միջավայրի ականատես, և՛ Իսահակյանը, ով ևս հասցրել էր ճանաչել վտանգներով լեցուն ժամանակն ու մարդկանց:

Գրականության մեջ ավարտի, մահվան մասին մտքերի անընդհատ արծարծման առումով գրականագետ Ալ. Թոփչյանը գրում է. «Եվրոպական գեղարվեստական միտքը դարասկիզբ էր մտնում

¹³ *Արմեն Սևան*, Նահատակ գրողներ, Գիրք Ա, Սօֆիա, 1931, էջ 78:

¹⁴ Տե՛ս *Ջրբաշյան Էդ.*, Ռուբեն Սևակ, Երևան, 1965, էջ 66:

¹⁵ *Թումանյան Հ.*, Երկեր, Երևան, 1978, էջ 54:

գաղափարների վերջալույսի շողերի տակ: Իշխողը ավարտի խորհուրդն էր: Այդ ավարտը սիմվոլիստների համար նորի հաստատման, կայացման խորհուրդ էր»¹⁶:

Ըստ Կլադիմիր Կիրակոսյանի՝ «Մաքիա-Մունի» բանաստեղծության ազդակը շոպենհաուերյան փիլիսոփայությունն է, որ շատ ընդհանրություններ ունի բուդդայական ուսմունքի հետ: Բանաստեղծությունը կառուցվածքով նմանեցնում է Նիցշեի «Այսպես խոսեց Զրադաշտը» աշխատությանը¹⁷: Փոխվել է մարդը, նա չի կարող ըմբռնել ճշմարտությունը, երազը, դրամը փոխել է մարդուն: Անշուշտ, ժամանակը իր ազդեցությունը պիտի ունենար գրողի խոհափիլիսոփայության վրա, հատկապես «Մարդեգության» մեջ Մահվան վերաբերյալ դատողությունները ազդակ են Շոպենհաուերի փիլիսոփայության. «Մինչև անգամ մահվան շեմին, մենք ձգտում ենք կամ դեպի հեռավոր ապագան, կամ հեռավոր անցյալը, իսկ ներկան երբեք չի բավարարում մեզ: Մենք նկատում ենք, որ ամբողջ կյանքում հետամուտ ենք եղել տեսիլապատկերների և մեր կամքը բավարարող ոչինչ չենք գտել: Ներկա կյանքը մեզ բավարարել չի կարող»¹⁸: Այնուամենայնիվ, չպետք է մոռանալ, որ արևմտահայության ծանր վիճակը, ջարդի ու հալածանքի լուրերը հասնում էին օտար երկրներում գտնվող ուսանողներին ու նրանք ժամանակի հոռետեսական փիլիսոփայությանը գումարում էին իրենց ազգային ցավը, մահվան թեման արծարծվում էր երկու առումով՝ հավերժություն և խավար: Արմեն Սևանը գրում է. «Միրոյ և մահվան գաղափարները անբաժան են բանաստեղծին մտածողության մեջ. Ամենէն երջանիկ պահու մ՝ իսկ, մահուան սև շուքը իր ներկայութիւնը կը զգացնէ և քերթողը տեսապէս կ՝ ապրի անոր մղձաւանջին տակ»¹⁹:

Զրադաշտի խոսքերը՝ «Մարդը մի բան է, որ պետք է հաղթահարվի»²⁰, ըստ Սևակի՝ պիտի հաղթահարի ինքն իրենից բարձրանալով, ինքն իրեն հաղթելով, դա պետք է լինի աշխատանքի շնորհիվ, մինչդեռ Նիցշեի ուսմունքը, օրինակ, հակադրվում է այս գաղափարներին, այն մարդուն տանում է ծուլության: Այս տեսանկյունից Սևակի գաղափարը հարազատ է

¹⁶ **Թովմյան Ալ.**, Պարտքի և պատվի ասպետը, «Ռ. Սևակ.125», Հոդվածների ժողովածու, Երևան, 2011, էջ 6:

¹⁷ Տե՛ս **Կիրակոսյան Վ.**, Ռուբեն Սևակ, Երևան, 1972, էջ 74:

¹⁸ **Шопенгауер А.**, Статьи эстетические , философские.Афоризмы, Харьков, 1888, էջ 232:

¹⁹ **Արմեն Սևան.** Նշվ.աշխ., էջ 99:

²⁰ **Նիցշե Ֆ.**, Այսպես խոսեց Զրադաշտը, Երևան, 2011, էջ 47:

Ռուդոլֆ Շտայների փիլիսոփայությանը. «Անձը ոչ թե հաղթահարվում է, այլ ենթարկվում է բարձրագույն ձևավորման»²¹:

Աստծո գոյության, մարդու՝ աշխարհում միայնակ լինելու խնդիրը խորապես արտահայտվեց էքզիստենցիալիզմի գրականության երկու թևերում (Աթեիստական, Կրոնական): Գոյության խնդրի հարցերը արծարծվում էին հայ գրականության մեջ՝ առանց այդ անվանելու էքզիստենցիալ կամ մեկ այլ անվանմամբ, արևելահայ թևում Ավ. Իսահակյանի խոհափիլսոփայության մեջ ենք տեսնում այդ ուղղության տարրեր: «Պրոսխումե» (Ուշադրություն) սոնետում Ինտրան մարդու՝ Աստծուն հասնելու ուղին տեսնում էր մաքրության միջոցով²²: Ներքին մաքրությունը միակ ճանապարհն է: Այսպես է և «Բժշկին գիրքեն փրցված էջեր»-ում Սևակի լուծումը, համոզմունքը, վոլտերյան եռոտանին պիտի ուղենիշ լինի մարդու համար՝ աշխատասիրություն, մաքրություն, չափավորություն (318):

20-րդ դարասկզբին, երբ աշխարհը մերժում էր Աստծո գոյությունը, գրականության մեջ կասկածի տակ էր առնված այդ հարցը, Ինտրան քարոզում էր Ավետարանը. «Ինչպես ամեն բան գեղեցիկ է տառապանքեն ետքը»²³: Ինտրայի այս տողը մի ամբողջ փիլիսոփայական ուսմունքի արդյունք է, նա դնում է Աստծո գոյության ու մարդու տառապանքի խնդիրը, մինևույն ժամանակ գոյության՝ էքզիստենցի խնդիրը, ասես էքզիստենցիալ ուղղության կրոնական թևի ներկայացուցիչ լինի: Իսկ Ռուբեն Սևակը դնում է էքզիստենցիալ հարցեր, ու չի ընդունում Աստծո գոյության փաստը (աթեիստական թևի ներկայացուցիչ), մարդը միայնակ է, բայց ինքն իրեն կարող է պաշտպանել ու պետք է ունենա կամք. «Որոշե՛, պայքարե՛, կամքով և հավատքով (Սեփական ուժերի նկատմամբ հավատ-Ա.Ս.) հառաջ մղե նպատակդ ու հաջողությունը պիտի հասնի քեզ... Կամք ու պայքար: Ասոնք են հաջողության ճնողքները» (385):

Կամքի խնդիրը էքզիստենցիալիզմի մեջ կարևորագույնն էր, հիմնական առանցքը: Սևակը փորձում է ապրելու կամք, ապրելու հանդեպ սեր ներարկել մարդկանց մեջ, օրինակներ ցույց տալ, պատասխաններ մատնանշել («Բժշկին գիրքեն փրցված էջեր»): Այդպիսին են նաև Ժան Պոլ Սարտրի էքզիստենցիալիստական հայացքները: Ըստ Սարտրի՝ ամենաանելանելի իրավիճակներում նույնիսկ ելք կա, իսկ այդ ելքը մարդու

²¹ Շտայներ Ռ., Թեոսոֆիա, Երևան, 2003, էջ 67:

²² Ինտրա, Հովին ձայնը, էջ 305:

²³ Ինտրա, Ներաշխարհ, Երևան, 2006, էջ 67:

գործունեությունն է: Եթե ինչ-որ տեղ գնում ես, ինչ-որ տեղ կհասնես²⁴: Չնայած էական է այս մեթոդի դրսևորումները հայ գրականության մեջ, այնուամենայնիվ, մենք հակված ենք Ս. Թոփչյանի տեսակետին, որի կարծիքով կամքի կարևորումը գալիս էր Ա. Շոպենհաուերի փիլիսոփայությունից: Գոյի ներքին էությունը՝ կամքը, իմացությունը ենթարկում է իրեն որպես մարդու և ցեղի պահպանման միջոց. «Նեոտոմանտիկների տեսական ու ստեղծագործական պրակտիկայում կիրառվում էին նրա (Շոպենհաուերի-Ա. Ս.) փիլիսոփայության հիմնական որոշ դրույթներ ու հասկացություններ, որոշ այլափոխությամբ ու հարմարեցնելով պատմական հանգամանքներին»²⁵: Ռուբեն Սևակի փիլիսոփայության էական առանձնահատկությունը կենսաշատությունն է: Սևակի համար սերը հաղթող գործոն է, ու եթե այն կա, մահը սարսափելի չէ, քանի որ սերը կարող է մահվան մեջ էլ ունենալ շարունակություն, ինչպես կյանքը, որի շարունակությունն է մահը, Անհունը: Մահը կյանքի շարունակությունն է, կամ կյանքի հավերժ գոյությունը: Սա նաև Հ. Թումանյանի խոհափիլիսոփայության կենտրոնական գաղափարներից է: «Ոստան»-ի երկրորդ համարում տպվում է Հ. Թումանյանի «Դեպի Անհունը» պոեմը²⁶, ինչն, անշուշտ, պատահական չէր, ինչո՞ւ հենց այդ փիլիսոփայական գործը. Իհարկե ժամանակի և արդիական թեմայի պահանջով:

Թե մահը լավ է, միայն մենք՝ տգետ,
Մենք խեղճ, կարճամիտ, ու չենք հասկանում՝
Ինչպես է գալիս և ուր է տանում...
Էսօրն ինչ է որ, -մի երեկ է նոր,
Էսօրն էլ կանցնի, երեկ կըղաճնա,
Հավերժականը չունի կերպարանք,
Նա լուռ է, անշարժ, հաստատ, աներեր...²⁷

Հ. Թումանյանի խոհափիլիսոփայության մեջ առանցքային է «Դեպի Անհունը» պոեմը, որում արտահայտված գաղափարները ընդհանրանում են Ռուբեն Սևակի խոհափիլիսոփայության հետ. «Ուրեմն մեռե՞ր է: Ինչպե՞ս հավատալ...ինչպե՞ս չհավատալ...Ի՞նչ էր կյանքը, ու մահը ի՞նչ...Ո՞րն էր իրական, ո՞րն էր անիրական...»(274): Մինչդեռ Բնտրային այս հարցում

²⁴ *Сартр Ж. П.*, Экзистенциализм это гуманизм, <http://scepsis.net/library/id-545.html>:

²⁵ *Թոփչյան Ս.*, Ռուբեն Սևակ, Երկեր, Երևան, 1985, էջ 11:

²⁶ Տե՛ս «Ոստան», Կ.Պոլիս, 1911, Ա տարի, № 2, էջ 276-283:

²⁷ *Թումանյան Հ.*, Նշվ. աշխ., էջ 356:

բնորոշ է դուրյանական կասկածի կերպը (հարցման միջոցով ժխտումը, կասկածը)։

Եթե հու՛սկ այգն ալ որում հեք հոգին կ'անձկայ,
Դատարկն է, զուրկ Յայտնութեան պաղպաղէն անհուն,
Լա՛ւ է, փշոց հետ, գլխիկոր չըքանալ այժմէն²⁸։

Հ. Թումանյանի նման Սևակն էլ նայում է հավերժ փայլող աստղին՝ գուշակելու մարդու թվավորված ժամանակի մեջ դրված կյանքի խորհուրդն ու գաղտնիքը, ու եթե Թումանյանի աստղը Սիրիուսն էր՝ ամենապայծառն ու հեռավորը, Սևակը պարզապես նայում է մի աստղի, բայց ամեն անգամ գտնում նրան երկնքի անհունի մեջ ու իրեն շատ մոտ, աստղը Անհունի գոյության վերջին հույսն է։

Դուն կաս ու չիկաս,- խաբկանքը լույսին.
Դուն Հույսն ես հեռվի,- Հույսը անհույսին...
Ու երբ արցունքոտ բիբերս կհեան,
Ես քեզ կնայիմ, ով Աստղ իրկվան:
Կյանքը երգ մ'է քիչ...Ու ի՞նչ կյանք, Աստված.
Միշտ Հույսին հարած ու միշտ ալ խաբված...
-Ծեր է սիրտս, բայց աչերս սիրակեզ,
Ով Աստղ իրիկվան, դեռ կնայիմ քեզ...(174)

Ա. Ստեփանյան

Ռուբեն Սևակի փիլիսոփայությունը 20-րդ դարասկզբի փիլիսոփայության համապատկերում Ամփոփում

Ռուբեն Սևակի խոհափիլիսոփայությունը արձագանքն էր իր ժամանակի ու մտածողության։ Թեև Սևակի ստեղծագործության մեջ զգալի է Նիցշեի, Շոպենհաուերի, բուդդայական ուսմունքի ազդեցությունը, այնուամենայնիվ, գրողի փիլիսոփայության մեջ կարևորվում է կենսասիրությունը, մարդասիրությունը։ Իր փիլիսոփայությամբ Սևակը մարդկության փրկության համար լուծումներ է առաջարկում՝ աշխատասիրություն, մաքրություն, չափավորություն։

А. Степанян

Философия Рубена Севака в контексте философии 20-го века

Резюме

Философия Рубена Севака была отражением мысли его времени. Хотя в произведениях Севака велико воздействие Ницше, Шопенгауера и

²⁸ *Ինտրա*, նշվ. աշխ., էջ 378։

буддистского учения, поэт также выделяет жизнелюбие и гуманизм. Своей философией Севак предлагает трудолюбие, чистоту и скромность, как решение для спасения человечества.

A. Stepanyan

Ruben Sevak's Philosophy in the Context of the 20th Century Philosophy.

Summary

The philosophy of Ruben Sevak was the reverbation of time and thought. Although Sevak's work was affected by Nietzsche, Schopenhauer and Buddhism, he also stressed the love towards life and humanism. With his philosophy, Sevak proposes diligence, purity and modesty as a cure for humanity.